



Satisfatgs cun las tractativas: Duri Bezzola, president LR, Anita Capaul, manadra da la CER, Silvana Derungs, presidenta ULR (da san.).

FOTO A.DERMONT-STUPAN

Chasa Editura en Chasa Rumantscha

ULR e LR collavuran a favur da la Chasa Editura Rumantscha

DAD AITA DERMONT-STUPAN

■ **L'Unìun per la Litteratura Rumantscha (ULR) sa participescha da nov er ella, ensemen cun la LR, sco societara da la Chasa Editura Rumantscha, ScRL. Dumenic Andry daventa nov commember da la suprastanza. Suen-ter ina fasa da pilot da trais onns è vegnida fixada per ils proxims quatter onns la cunvegna da prestaziun definitiva per la CER tranter la Lia Rumantscha ed il chantun.** Il president da la LR, *Duri Bezzola*, ha infurmà a la radunanza davart las tractativas cun il chantun. El sa mussa satisfatg che quel saja stà pront pass per pass d'augmentar las contribuziuns. Actualmain stattan a disposiziun a la CER 180 000 francs per produziuns litteraras. Il president da la LR vesa surtut ils avantatgs da translocar il biro la CER en Chasa Rumantscha: spargnar daners (che van a favur d'ina

produziun litterara), trair a niz sinergias, meglierar ils contacts, rinforzar la collavuraziun professiunala ed administrativa. «Eu sun cuntaint cha'l dialog cun l'ULR è sa sviluppa en moda früttaivla», ha el ditg.

Numnà cussegl editorial

Sin proposta da la suprastanza da l'ULR è vegnidas proponidas tschintg persunas per il cussegl editorial, il qual decida davart ils texts che vegnan edids. Quellas persunas vegnan approvadas en encliegentscha cun il chantun. L'indipendenza da la CER envers ils gremis da la LR sto esser garantida. Per la gestiun da la CER è responsabla la manadra *Anita Capaul*. Ella ha pudì vegnir engaschada vinavant en in pensum da 60 perschievants. Per onn ston vegnir edids almain sis titels. Dus da quels pon sa drizzar ad uffants u giuvenils. *Karin Kohler* ch'era fin ussa responsabla per ediziuns

d'uffants tar la LR collavura cun la manadra CER, mintgina ha dentant ses agen carnet da duairs. Sin proposta da la LR decida la radunanza da daventar societara CER, ScRL.

Ulteriuras fatschentas

Plinavant ha la radunanza generala decidi dad augmentar la contribuziun annuala per commembras e commembers sin 80 francs (40 francs per students) e da reducir ils sustegn per lectorats ad auturas ed auturs betg commembers da l'unìun. Da nov è *Dumenic Andry* vegnì elegì sco ulteriur suprastant da la ULR. Ils commembers da suprastanza en uffizi, *Silvana Derungs*, *Aita Dermont* e *Benedetto Vigne*, èn vegnids confermads. Il quint annual serra cun in gudogn da bundant 3000 francs. Ils revisurs da quint *Martin Camenisch* e *Linus Berther* èn vegnids elegids retroactiva-main.